



Präschaints 35 votantas e votants

Tractandas

- 1 Tscherna dals scrutinadurs
- 2 Preparaziun e deliberaziun d'üna revisiun parziala da la planisaziun locala – ledscha da seguondas abitaziuns ed inventar dals fabricats caracteristics dal lö
- 3 Preparaziun e deliberaziun d'üna revisiun parziala da la planisaziun locala – spazi da protecziun da las auas
- 4 Approvaziun da l'adattamaint da la quota da vendita da bains immobigliars ad esters (armonisaziun i'l cumün fusiunà)
- 5 Approvaziun d'ün contrat da concessiun per la retratta d'aua da fuond cun Filipp Grass in Präschaints
- 6 Comunicaziuns e varia
 - 6.1 Infuormaziuns sur da rendaquints da credits approvats

2'400'000 chf	Zernez – Centrala da s-chodamaint Cul	27-06-2016
500'000 chf	Suotpassagi da la VR in Champatsch	22-05-2017
231'444 chf	Lavin – Funtanivas	25-07-2016
220'000 chf	SIE Zernez – Val Mela 2017/2018	12-12-2017
100'000 chf	Prunader (gener «Manitou»)	12-12-2017
60'000 chf	Server central – rimplazzamaint	30-11-2018
 - 6.2 Comunicaziuns
 - 6.2.1 Tour a cogniziun il rendaquint 2018 da l'EE-Energia Engiadina
 - 6.2.2 Infuormaziuns sur da l'intenziun d'integrar il Consorzi Chasa Puntota / Dmura d'attempats in Engiadina Bassa i'l Center da sandà Engiadina Bassa
 - 6.3 Varia

Il president cumünal Emil Müller salüda a las votantas ed als votants a quista radunanza cumünala. El ha constatà cha la bannida es gnüda protramissa a temp.

Il protocol no. 1/2019 da la radunanza cumünala dals 24 gün 2019 es stat publichà. Dürant il temp da publicaziun nu sun entradas ingünas protestas cunter il protocol. Cun quai vala il protocol sco approvà. Causa cha la spüerta d'ün transport organisà tanter Lavin e Zernez nun es gnü trat a nüz da propcha blera glied ha la suprastanza cumünala decis da strichar almain per prouva quist transport.

In seis pled introductiv manzuna il president l'importanza da quista radunanza. Tantüna po il suveran masinar il svilup e la direcziun d'ün cumün il plü bain cun decider sur da progets da la planisaziun locala.

1 Tscherna dals scrutinadurs

Sco scrutinadurs in sala sun gnüts tschernüts Guolf Denoth e Guido Zellweger.

2 Preparaziun e deliberaziun d'üna revisiun parziala da la planisaziun locala – ledscha da seguondas abitaziuns ed inventar dals fabricats caracteristics dal lö

La respunsabla per la planisaziun locala illa suprastanza cumünala, Martina Peretti introdüa illa tractanda cun infuormar sur da quista revisiun parziala da la planisaziun locala. Ün dals planisaders cumünals, Dominik Rüeegg dal büro Stauffer & Studach AG da Cuaira es preschaint per respunder dumondas da rom.

La Confederaziun ha introdüt süls 1. schner 2016 sia ledscha federala da seguondas abitaziuns (ZWG). Quista ledscha regla impustüt las pussibilitats per realisar fabricats da seguondas abitaziuns suot restricziuns e cundiziuns, eir davo l'approvaziun da l'iniziativa cunter il fabricar seguondas abitaziuns dals 11 marz 2012. Per pudair pussibilitar similis fabricats eir in nos cumün e quai cun plü pacs impedimaints pussibels, ha la cumischiun da planisaziun cumünala preparà insembel cul planisader cumünal a man da la suprastanza la ledscha (cumünala) da seguondas abitaziuns e l'inventar dals fabricats caracteristics dal lö (ortsbildprägende Bauten).

La revisiun manzunada es statta publichada dals 6 november fin als 6 december 2018. Dürant quista publicaziun d'intervenziun sun entradas intervenziuns, chi s'ha pudü resguardar e/o respunder directamaing. La preexaminaziun tras ils uffizis chantunals ha gnü lö. In seguit a quistas proceduras ha la suprastanza cumünala decis da preschantar quist proget a la radunanza cumünala, culla proposta da rinviar il proget a la votaziun a l'urna dals 24 november 2019. L'entrada in vigur legala da la revisiun (ledscha ed inventar) es previssa süls 1. schner 2020, premiss cha la Regenza dal Chantun Grischun possa approvar il proget sco decis dal suveran.

Martina Peretti declera il perche chi s'ha insomma elavurà quists duos instrumaints da planisaziun?

- Il böt principal es d'avair sgürezza e da pudair pussibilitar la fabrica da seguondas abitaziuns, quai in stabilimaints caracteristics pel lö, eir in nos cumün, e quai cun plü pacs impedimaints pussibels.
- Inavant han ils cumüns anteriurs da Zernez/Brail, Susch e Lavin differentas prescripziuns/regulaziuns a regard fabricas da prümas e seguondas abitaziuns. Quistas sun actual amo valablas e dessan uschea gnir armonisadas.
- Ed implü as ha la pussibilità da cumplettar la ledscha federala in rom da la ledscha cumünala.

In connex cun l'inventar da fabricats caracteristics pel lö (Ortsbildprägende Bauten) as po manzunar il seguint:

- La classificaziun dals edifizis es gnüda fatta in rom d'ün concept da protecziun in collavuraziun culla chüra da monumaints chantunala ed inavant tenor ün sistem unitar in chantun Grischun. I's ha guardà la posiziun, fuorma e la substanza, dat puncts per quists ed ils edifizis cun üna tscherta quantità puncts sun lura gnüts tuts sü. Ils detagls sun stats publichats.
- Natüralmaing cha in minchün da quists edifizis es eir in avegnir adüna pussibel da realisar prümas abitaziuns o eir ün oter adöver, sco per exaimpel localitats da büro.
- Inavant fa ella surasèn, cha tenor la ledscha da seguondas abitaziuns, stessa esser pussibel da fabricar seguondas abitaziuns eir in stabilimaints vöds, chi nun han explizit il status tenor quist inventar, dimpersè ün'oter status da protecziun, forsa tenor la chüra da monumaints. Ils detagls esa adüna da guardar individual.

A regard quist müdamaint da la planisaziun manzuna ella in spezial amo la fracziun da Susch. Per pudair insomma segnar ils stabilimaints caracteristics in quist inventar, ston tals as rechattar in üna zona cun ün status da protecziun. A Susch d'eira quist avantman be vi Surpunt, inua cha'l museum nouv as rechatta, in fuorma d'ün areal degn da gnir mantgnü (Erhaltungsbereich). Nus vain perquai in minimum stuvü schlargiar quist areal sün grondas parts dal cumün. Sainza quista masüra nu's vess pudü far l'inventar per Susch.

Sün dumonda d'ün votant davo la taxa da manisaziun (Lenkungsabgabe), art. 14, po gnir respusa, cha per surfatschas da novas seguondas abitaziuns vain inchaschada üna simla taxa illa valur da 100.00 fin 500.00 per m2 (i'l prüm on d'introducziun da quista ledscha illa valur da 300.00 chf/m2). La suprastanza definischa

l'otezza da la taxa i'l rom da la ledscha. La munaida inchaschada es liada per ils scopus tenor alinea 3 da l'artichel 14 (mantegniment ed augment da valurs da stabels da fabricats characteristics dal lö etc.).

La radunanza cumünala ha deliberà la revisiun parziala da la planisaziun locala sco preschantada cun unanimità da vuschs a man da la votaziun a l'urna dals 24 november 2019.

3 Preparaziun e deliberaziun d'üna revisiun parziala da la planisaziun locala – spazi da protecziun da las auas

La responsabla per la planisaziun locala illa suprastanza cumünala, Martina Peretti introdua illa tractanda cun infuormar sur da quista revisiun parziala da la planisaziun locala. Ün dals planisaders cumünals, Dominik Rüegg dal büro Stauffer & Studach AG da Cuaira es preschaint per respunder dumondas da rom.

La Confederaziun e'l Chantun Grischun pretendan cha'ls cumüns mainan tras üna separaziun dal spazi da protecziun per las auas (Gewässerraumausscheidung – GWR) cun resguardar lur prescripziuns superiuras. La cumischiun da planisaziun cumünala ha preparà insembel cul planisader cumünal a man da la suprastanza il spazi da protecziun da las auas cun resguardar plü bain pussibel ils bsögns dals pertocs.

La revisiun manzunada es statta publichada dals 29 october fin als 28 november 2018. Dürant quista publicaziun d'intervenziun sun entradas intervenziuns, chi s'ha pudü resguardar e/o respunder directamaing. La preexaminaziun tras ils uffizis chantunals ha gnü lö. Dürant la preparaziun da la procedura s'ha amo trattà cun partidas privatas in Sot Plaz a Susch – in connex cun ün proget da fabrica pussibel - ed adattà in quel lö il spazi da protecziun d'auas cun comunicar quai directamaing als pertocs.

In seguit a quistas proceduras ha la suprastanza cumünala decis da preschantar quist proget a la radunanza cumünala, culla proposta da rinviar il proget a la votaziun a l'urna dals 24 november 2019. L'entrada in vigur legala dals plans es prevista süls 1. schner 2020, premiss cha la Regenza dal Chantun Grischun possa approvar il proget sco decis dal suveran.

Martina Peretti picla oura seguaints puncts principals da quista revisiun parziala:

- In general es il spazi d'aua gnü elavurà impustüt per las auas En, Spöl, Susasca, Lavinuoz ed implü per ün pêr auas plü pitschens cun relevanza per zonas da fabrica o agricultura.
- In quist connex as ha eir controllà e per part surlavurà il perimenter dad ognas existent.
- I'l spazi d'aua es da princip ün scumond da fabrica. I dà excepziuns.
- Surfatschas agriculas i'l spazi d'aua das-chan gnir nüzziats, quist però da möd intensiv, tenor prescripziuns dals pajamaints directs.

Da manzunar in spezial es, cha d'ürant la preparaziun da la procedura s'ha amo trattà cun partidas privatas in Sot Plaz a Susch – quist eir in connex cun ün proget da fabrica pussibel - ed adattà in quel lö il spazi da protecziun d'auas. Ils pertocs sun gnüts infuormats directamaing.

Il motiv per quist müdamaint es stat il manzun dal Chantun, cha il spazi d'aua sco preparà e publichà per quist lö, nu pudarà gnir acconsenti da la regenza. I s'ha in quist lö parcelas (amo) na surfabricadas, inua chi's laiva minimar il spazi da protecziun d'aua per pudair pussibilitar üna eventuala surfabricaziun. Il spazi d'aua ha uossa stuvü gnir corret darcheu sün larghezza normala. Üna surfabricaziun nu füss uschea bod plü pussibel. Cun muossar via però sün ün artichel d'exepziun, chi lascha pro la fabrica in üna uscheditta foura da surfabricaziun (Baulücke), provain uossa inavant da pussibilitar la fabrica eir sün quistas parcelas.

Sün dumonda d'ün votant scha l'areal manzunà in Sot Plaz a Susch possa gnir surfabrichà eir be cun stabels/abitaculs singuls vegn respus, ch'actualmaing saja üna partida privata landervia a prevair üna surfabricaziun sur tuot las parcelas oura. Pel mumaint nu s'ha daplü cugnuschentschas davart da quist intent da fabrica. I'l cas chi entressan dumondas da fabrica da fabricats singuls as retegna la suprastanza cumünala il dret d'inizialisar üna procedura per prevair in quel areal üna planisaziun da quartier.

Ün votant as dumonda, perche cha nos cumün haja da proseguir fingià uschè bod cun quista revisiun da la planisaziun locala. El propuona da nu far prescha e da nu manar uossa quista revisiun a la votaziun a l'urna.

Il planisader cumünal preschaint, la vicepresidenta e'l president cumünal muossan via sül fat, cha sainza definiziun da detagl dal spazi da protecziun d'auas valan prescripziuns transitorias dal Chantun GR, chi sun per gronda part plü restrictivas co quellas preparadas e preschantadas quista saira, causa cha la cumischiun da planisaziun insembel cun las instanzas operativas e strategicas han elavurà üna varianta cun resguardar il plü pitschen spazi da protecziun pussibel. Implü vala ün'incumbenza da la Confederaziun e dal Chantun da s-chaffir quista basa legala.

Ün votant voul savair, schi'd es previs cha qualchün indemnisescha als possessurs da las parcelas pertoccas la reducziun da la valor resp. da la facultà. Il president cumünal conferma cha in simils cas nu detta ingüna indemnisaziun da simlas valurs. Il medem votant demuossa üna tscherta dischillusiun cha las instanzas cumünalas nu sun idas cun el al lö a guardar sia situaziun individuala. Tenor el nu sun gnüts resguardats tuots ils cas cun listessa masüra. Ün cas in Praschitsch vain declerà plü detaglià.

Emil Müller muossa via sülla problematica d'avair stuvü agir plü güst pussibel cun tuot ils possessurs. Cha'ls üns sun pertocs plü ferm sco'ls oters es puchadamaing inevitabel. I'l cas individual s'ha respus al privat in scrit e muossà via süllas prescripziuns chi han da gnir tgnüdas aint ed eir süllas pussibilitats legalas cha minchün ha per agir e reagir.

La radunanza cumünala ha decis cun 31 vuschs cunter 1 vusch da nu vulair spostar la deliberaziun da la revisiun parziala da la planisaziun locala a man da la votaziun a l'urna ed ha cun quai deliberà la revisiun parziala da la planisaziun locala sco preschantada a man da la votaziun a l'urna dals 24 november 2019.

4 Approvaziun da l'adattamaint da la quota da vendita da bains immobigliars ad esters (armonisaziun i'l cumün fusiunà)

La quota da vendita da bains immobigliars ad esters (BewG o eir „Lex Koller“) regla la vendita d'immobiglias ad esters. Minch'on han ils cumüns d'annunzchar lur quota al Chantun Grischun. L'armonisaziun da quista quota davu la fusiun es in nos cumün amo pendent. I'ls contuorns da nos cumün as mouva eir la discussiun intuorn quista tematica da pudair vender immobiglias eir ad esters.

La situaziun **actuala** in nos cumün as preschainta sco segua:

<i>fracziun</i>	<i>quota per vendas our da surfabricaziuns</i>	<i>objects singuls da vendaders Svizzers (EO)</i>	<i>abitaziuns da seguonda man (ZHW); vendita dad ester ad ester</i>
Zernez/Brail	33 1/3 % regla individuala per vendas d'hotels d'appartamaints	na, be in cas d'importanza essenziala pel cumün	schi
Susch	100 %	schi	schi
Lavin	30 % zona da cumün= 100 %	schi	schi

La situaziun a Zernez nun es acuta chi's stuvess spettar ün augmoint considerabel da vendas d'immobiglias ad esters tras ils possessurs privats. Percunter as po cun quist augmoint da la quota s-chaffir premissas plü liberalas sün quist sector ed uschè promover ün svilup economic.

Perquai ha la suprastanza cumünala decis da propuoner l'adattamaint da la quota sün tuot il territori cumünal sün 100% a partir dals 1. schner 2020.

<i>cumün</i>	<i>quota per vendas our da surfabricaziuns</i>	<i>objects singuls da vendaders Svizzers (EO)</i>	<i>abitaziuns da seguonda man (ZHW); vendita dad ester ad ester</i>
Zernez	100%	schi	schi

La radunanza cumünala ha approvà l'adattamaint da la quota da vendita da bains immobigliars ad esters cun 33 vuschs cunter 1 vusch sco proponü da la suprastanza cumünala

5 Approvaziun d'ün contrat da concessiun per la retratta d'aua da fuond cun Filipp Grass per la produenziun da naiv artificiala in Praschitsch

Als 24 schner 2019 ha Filipp Grass inoltrà üna dumonda da concessiun per la retratta d'aua da fuond sün sia parcella no. 715 in Praschitsch. El dumonda da pudair retrar aua da fuond per l'adöver da la sauaziun dal fuond agricul e per la preparaziun da la pista da naiv/glatsch pel sia gestiun da trenamaints da sgürezza d'ir cun l'auto. La retratta maximala s'amunta a 1'600 liters per minut. Las taxas unicas ed annualas sun adattats als contrats similis ed a la quantità d'aua chi vain retratta. Il contrat da concessiun ha üna dürada da 25 ons. Il permiss chantunal da l'uffizi per la natüra e l'ambiant es avantman.

Ün votant propuona - cun muossar via sül müdamaint dal clima ed uschè sün l'intschertezza, schi detta in avegnir amo aua avuonda in nossa regiun - da redüer la dürada dal contrat da concessiun sün 5 ons, cun l'opziun da trattar lura sur d'üna prolungaziun.

La radunanza cumünala ha approvà il contrat da concessiun per la retratta d'aua da fuond cun Filipp Grass in Praschitsch sainza müdamaints cun 34 vuschs cunter 1 vusch.

6 Comunicaziuns e varia

6.1 Infuormaziun sur da seguaints rendaquints finals da credits approvats:

Tenor HRM2 es il cumün in dovair da preschantar al suveran ils rendaquints da credits approvats in simla fuorma.

8731.5030.01 2'400'000 chf Nouva centrala dal s-chodamaint Cul

Als 27-06-2016 ha la radunanza cumünala deliberà ün credit da 2'400'000 chf per eriger üna nouva centrala dal s-chodamaint central in Cul. Causa cha las valurs d'emissius nün han plü pudü gnir tgnüdas aint, vaiva l'uffizi per la natüra e l'ambiant chantunal dat temp fin ils 31-12-2017 per tour masüras correspudentas, da möd cha'l s-chodamaint correspuonda darcheu a las prescripziuns d'hozindi. Las lavurs sun gnüdas realisadas dal 2017 e l'indriz ha pudü gnir tut in funcziun a temp, nempe als 01-11-2017. Aint il stabilimaint da la centrala as ha güsta integrà la staziun da transfuormaziun (EW Zernez) e la centrala da la fibr'optica. Per quista part sun gnüts fixats ils cuosts cun 80'000 chf. Il proget sco tal es serrà giò ed ils cuosts totals s'amuntan a 2'552'971 chf, dimena 152'971 chf obain +6.37% daplü co previs.

8181.5010.12 500'000 chf Suotpassagi da la VR in Champatsch

La radunanza cumünala ha deliberà als 22-05-2017 ün credit brüt d'investiziun in l'otezza da 500'000 chf (cuosts nets restants pel cumün: 200'000 chf) per rimplazzar insembel culla Viafier Retica e cun trar a nüz sinergias in connex cul proget d'incablamaint d'infrastructura electrica da las OEE SA il suotpassagi da la Viafier Retica in Champatsch. Ils cuosts da fabrica cumplessivs d'eiran stimats sün 864'000 chf. La partecipaziun (sgürada) da la VR d'eira 50%, quella da las OEE SA 45'000 chf. Cun üna reserva d'eira previs l'ingaschamaint resp. il credit brüt dal cumün sün 500'000 chf. Las contribuziuns federalas e chantunales d'eiran stimadas sün 255'000 chf. Cun quai resultaivan cuosts nets pel cumün da maximalmaing 200'000 chf.

Il proget ha pudü gnir serrà giò cun grond success ed a satisfacziun da tuot ils partecipats, adonta cha la collavuraziun cun las OEE SA nun ha pudü gnir realisada. Ils cuosts da fabrica finals s'amuntan a 781'312 chf. La Viafier Retica s'ha partecipada cun 387'805 chf vi dals cuosts da fabrica. La Confederaziun ha contribui 127'975 chf e'l Chantun Grischun 124'097 chf. Uschè cha'ls cuosts restants per quist fabricat pel cumün s'amuntan a 141'434 chf, dimena -58'565 chf obain -29.3 % damain co previs (dals cuosts nets). Ils cuosts brüts da fabrica sun suot passats per -9.6 % obain per -82'687 chf.

7101.5031.60 231'444 chf Lavin – Funtanivas, provedimaint d'aua

Als 25-07-2016 ha la radunanza cumünala deliberà ün credit da 231'444 chf per sanar las duos praisas da la fontana Funtanivas. Il proget Lavin – Funtanivas refacziun dals inchaschaments d'aua da baiver, chi han stuvü gnir refats urgiaintamaing dal 2016, ha pudü gnir fini giò cun success d'urant l'on 2018. Ils cuosts totals s'amuntan a 165'946 chf, dimena -65'497 obain -28.29 % damain co previs.

8181.5010.11 220'000 chf SIE Val Mela

Als 12-12-2017 ha la radunanza cumünala deliberà ün credit da 220'000 chf per la sanaziun da la via da Val Mela. Our da motivs da sgürezza s'haja stuvü spostar la via vers la muntogna. La progettaziun es gnüda realisada in collavuraziun cun l'uffizi da god e privels da la natüra chantunal fingià dal 2016. La realisaziun dal proget sco tal es gnüda manada tras da prümvaira e stà 2018. Il passagi da la val es gnü construi a fuorma d'üna punt e da la vart vers l'Engiadin'Ota es gnü construi ün cuntschet da sgürezza cun crappa gronda per proteger l'access da la via cunter erosiun da material e crappa. Quist proget vain contribui da l'uffizi da god e privels da la natüra GR e da la Confederaziun cun 59'658 chf. Il proget es serrà giò ed ils cuosts totals s'amuntan a 175'542 chf, dimena 44'457 chf obain -20.21 % damain co previs.

8290.5060.80 100'000 chf Prunader (gener «Manitou»)

Als 12-12-2017 ha la radunanza cumünala deliberà ün credit da 100'000 chf per ün'investiziun in ün prunader a telescop. La surdatta dal prunader es gnüda manada tras d'utuon 2018. Ils cuosts effectivs s'amuntan a total 103'000 chf. Il rest dals cuosts cumpiglian las opziuns e l'inscripziun necessaria. Ils cuosts totals s'amuntan sün 107'221 chf, dimena 7'221 chf obain +7.22 % daplü co previs.

0210.5060.81 60'000 chf Server central - rimplazzamaint

Als 30-11-2018 ha la radunanza cumünala deliberà ün credit da 60'000 chf per rimplazzar il server central da tuot las gestiuns (incl. la scoula) dal Cumün da Zernez. Il server es gnü rimplazzà d'urant il mais favrer 2019 e tuot las lavurs da migraziun e configüraziun sun terminadas.

Ils cuosts totals s'amuntan a 47'072 chf, dimena -12'927 chf obain -21.5% damain co previs. Il motiv principal pel suot passamaint dal credit es cha diversas lavurs da migraziun han pudü gnir evasas plü simpel co previs e per part han ellas pudü gnir spostadas sün plü tard.

6.2 Comunicaziuns

6.2.1 Tour a cogniziun il rendaquint da l'EE-Energia Engiadina 2018

Ils statüts da l'EE-Energia Engiadina prevezzan cha'ls cumüns associats ad ella vegnan infuormats annualmaing sur dal rendaquint final, annual.

Il quint da gestiun serra cun ün guadogn da chf 1'336'667.55 pro entradas da chf 15'878'835.77 e sortidas da chf 14'542'168.22. La part dal Cumün da Zernez (fracziuns Susch e Lavin) al guadogn importa chf 53'550 (5.95%). La summa da bilantsch importaiva pels 31 december 2018 chf 27'943'687.01, il chapital agen chf 2'661'619.95.

Üna votanta metta in dumonda las grondas investiziuns sül sector dal provedimaint electric illa fracziun da Zernez (EW Zernez) resguardand la situaziun precara da liquidità dal cumün. Il president cumünal muossa via sün l'importanza da pudair e vulair far uossa investiziuns sün quist sector.

6.2.2 Infuormaziuns sur da l'intenziun d'integrar il Consorzi Chasa Puntota / Dmura d'attempts in Engiadina Bassa i'l Center da sandà Engiadina Bassa

Ils respunsabels da proget infuorman sün quista via, chi sun gnüdas examinadas las pussibilitats per manar insembel las spüertas, sco eir las estructuras da gestiun da las duos organisaziuns „Consorzi Chasa Puntota /

Dmura d'attempats in Engiadina Bassa (CCPO) e la fundaziun „Center da sandà Engiadina Bassa / Gesundheitszentrum in Engiadina Bassa (CSEB)“. In quel connex s'ha pudü identifichar multifaris potenzials da sinergias, chi pon metter in movimaint numerus effects positivs per las personas chi vegnan chüradas, per las collavuraturas e'ls collavuratur, per las organisaziuns partecipadas ed eir pel provedimaint da sandà regional. Per l'integraziun da la Chasa Puntota i'l CSEB sto gnir abinà ün contrat da transferimaint da possess, chi sto gnir approvà dals cumüns da fundaziun dal CSEB. La suprastanza e la radunanza consorziala dal Consorzi Chasa Puntota / Dmura d'attempats in Engiadina Bassa, sco eir la suprastanza e'l cussagl da fundaziun dal Center da sandà Engiadina Bassa sun per quist model d'integraziun e cussaglian a la populaziun dad eir approvar quist intent. Il contrat manzunà gnarà preschantà amo quist'utuon a la radunanza cumünala per l'approvaziun. L'integraziun es previssa da manar tras süls 1. schner 2020.

Ün votant s'indreschischa davo la valor da las parzialas dal Consorzi Chasa Puntota / Dmura d'attempats in Engiadina Bassa e che import chi vain pajà oura als cumüns in connex cun quista fusiun.

Ün ulteriur votant voul avair scleri, scha'l Bogn Engiadina Scuol (BES) fa part al CSEB e scha schi, co cha'ls cuosts resp. defizits da quist vegnan scumpartits süls cumüns. Il president cumünal po quietar ed infuormar cha'ls defizits dal BES nu vegnan scumpartits süls cumüns partenaris dal CSEB. Implü as dumonda il votant, cun che cuosts annuals implü chi s'ha da far quint cun quista fusiun. Emil Müller renda attent ad üna missiva plü detagliada chi'd es actualmaing in elavuraziun, chi vain publichada a temp per cha la votanta e'l votant illa regiun as possa s'infuormar in detagl. Il manader da finanzas e d'impostas manzuna cha i'l preventiv 2020 es pel mumaint previs d'integrar l'import dal conto dal quint da success no. 4120.3612.02 „Contribuziuns chüra Chasa Puntota“ i'l conto no. 4120.3612.01 „Contribuziuns chüra e fliamaint CSEB“, quai chi ha per consequenza chi nu's prevezza ün augmait da cuosts annuals. Ün'ulteriura dumonda, che chi succeda cul proget, scha almain ün cumün pertoc dschess da na, nu po gnir respusa. Sur da quista dumonda gnarà infuormà illa radunanza da votaziun in november.

Il votant insista sülla protocollaziun da sias dumondas ed impustüt da la resposta sün si'ultima dumonda a regard las consequenzas finanzialas pel Cumün da Zernez. Il president cumünal conferma, quai cha las duos instanzas da controlla da las duos firmas intretschadas han confermà eir in scrit, chi nu detta ingünas consequenzas negativas finanzialas pels cumüns.

Proget da sanaziun da la via maistra tras la fracziun da Zernez

Il president cumünal Emil Müller infuorma, cha d'ürant la publicaziun uffiziala dal proget (Auflageprojekt) tras il Chantun Grischun sun entradas diversas protestas (objecziuns) cunter il proget, impustüt chi's drizzan vers las tematicas da sgürezza (vias e peduns), sveltezza, canera ed acquist da terrain. Il Chantun GR sco patrun da fabrica da la via chantunala s'ha decis da laschar far ün perizia da canera (Lärmgutachten) e da vulair lura analizar la situaziun resp. il proget actual a basa dals resultats da quista perizia. Quista decisiun ha per consequenza, cha'l proget sto gnir suspais per almain ün on, v.d. cha las lavurs da fabrica pon gnir tuttas per mans pür da prümavaira 2021. Las lavurs da planisaziun da detagl pon gnir manadas tras d'ürant l'inviern 2019-2020 e d'ürant il 2020.

Il Cumün da Zernez prevezza da manar tras sia procedura d'intervenziun (Mitwirkungsverfahren) per la part da l'infrastructura publica amo d'ürant quist on.

Acquist da la chamonna Bunaloua a Susch

Il president cumünal comunichescha cha be d'incuort as ha listess amo pudü acquistar la chamonna militarica in Bunaloua a Susch da la Confederaziun, però cun la cundiziun ch'ella das-cha gnir dovada/abitada be d'ürant ils mais da stà/utuon (sainza naiv). La chamonna gnarà scritta oura per la fittanza d'ürant ils prossems mais.

6.3 Varia

Rinch da maschinas Engiadina Bassa

Ün votant rinfatscha al president cumünal d'avair agi in connex culla s-chaffida dal «Rinch da maschinas Engiadina Bassa» in aigna cumpetenza. Tenor il votant vaiva la radunanza cumünala decis da crear ün rinch da maschinas culs cumüns vaschins da Scuol e Valsot. Adonta cha'l Cumün da Valsot as vaiva lura retrat,

saja gnü fuondà il rinch da maschinas. Emil Müller refüsa quista rinfatscha e dumonda temp da pudair sclerir il fat.

Planisaziun d'areal Cul

Sülla dumonda d'ün votant davo il stadi da la planisaziun d'areal in Cul po la responsabla per la planisaziun locala muosar via chi's as rechatta illa fasa finala da preparaziun da plans e prescripziuns e chi's vuol uossa lura proseguir culla publicaziun da la planisaziun.

Collavuraziun pulizia chantunala e cumünala

Sün dumonda po il president cumünal infuormar, cha eir l'ultim cumün intretschà illa collavuraziun, il Cumün da Val Müstair, haja decis in sen positiv in sia radunanza cumünala dals 21 avuost 2019.

Ün votant piglia il pled e manzuna ils seguaints temas.

Dons da lavinas 2019

El fa ün grond cumplimaint als respunsabels da las Gestions Tecnicas e dal cumün per la grondiusa spüerta e collavuraziun in connex cullas rumidas dals dons da lavinas da l'ultim inviern. Sainza quist agüd nu füssa stat pussibel da rumir ils dons.

Fö artificial dals 1. avuost a Zernez

Eir el as dumonda, scha ün simil fö artificial fetscha propcha amo sen e dabsögn. Il president cumünal po quietar e comunicar, cha la suprastanza cumünala haja fingià strichà quist'expensa our dal preventiv 2020. El manzuna però, chi s'ha constatà güst quist on, cha la blerüra dals visitadurs da la festa dals prüms avuost a Zernez hajan bandunà l'areal da festa subit davo l'evenimaint dal fö artificial, v.d. cha plü co facil as stuvà spettar in avegnir damain consüments illa tenda da festa.

Via da schlitra Munt Baselgia

El as dumonda, perche chi nu vain gestida la via da schlitra sü Munt Baselgia. Il manader da las Gestions Tecnicas manzuna cha cun blera naiv nun ha il cumün maschinas adattadas per preparar la via da schlitra.

Destinaziun turistica

Il votant intimescha da ponderar per la prosma vouta chi's da la dumonda d'üna collavuraziun cun üna destinaziun turistica, schi nu's fa meglider da collavurar plü bain e stret cul Parc Naziunal Svizzer a Zernez.

Idiom da Zernez

E lura sta al votant amo l'idiom da Zernez a cour. El manchainta in scoula e pro'ls magisters l'instrucziun da l'idiom Zernez («Jou»).

Il president cumünal ingrazcha a las preschaintas ed als preschaints per la cumparsa e per l'interess demuossà, giavüscha a tuots ün bel temp d'utuon ed invida ad ün aperitiv.

Il president

 Emil Müller

Il chanzlist

 Corsin Scandella

Dürada da la radunanza:
 20:00h fin 22:00h



Publicaziun dal protocol:

5 settember 2019 fin 4 october 2019.

Protestas cunter quist protocol sun d'inoltrar in scrit fin als 4 october 2019 a la suprastanza cumünala dal Cumün da Zernez.